

29 DEC 1996

MOKHTAR SELAT PULANG SELASA

KUALA LUMPUR, 29 Dis (Bernama) -- Duta Malaysia ke Peru Ahmad Mokhtar Selat yang baru saja dibebaskan setelah dijadikan tebusan oleh pemberontak di negara itu, dijangka pulang ke tanah air Selasa ini dengan diiringi Menteri Luar Datuk Abdullah Ahmad Badawi.

Ahmad Mokhtar yang juga akan diiringi keluarganya akan pulang menerusi Mexico dan Los Angeles dengan pesawat yang sama dengan Abdullah pada 3.30 petang waktu tempatan esok (Isnin), demikian menurut seorang pegawai Wisma Putra.

Ahmad Mokhtar ialah antara lebih 500 orang tetamu Duta Jepun ke Peru yang dijadikan tebusan apabila gerila Pergerakan Revolusi Tupac Amaru menawan kediaman duta itu pada 17 Dis lepas. Sebahagian daripada tebusan itu dibebaskan secara berperingkat.

Diplomat Malaysia itu ialah antara 20 tebusan yang dibebaskan 6 pagi ini (waktu Malaysia).

"Perwakilan Malaysia di Mexico sedang membuat persiapan untuk penerbangan pulang Ahmad Mokhtar ke tanah air dari sana. Dijangka paling awal mereka tiba ialah Selasa ini," katanya.

Sehingga petang ini tidak dapat dipastikan sama ada Abdullah masih berada di Lima atau menunggu Ahmad Mokhtar di Mexico. Abdullah, yang diutus khas oleh Perdana Menteri Datuk Seri Dr Mahathir Mohamad untuk berusaha membebaskan Ahmad Mokhtar, dilaporkan telah meninggalkan ibu negeri Peru itu kira-kira lima jam sebelum duta itu dibebaskan. -- BERNAMA

ZKS MAI